

Governu entrega OJE tinan 2021 ba Parlamentu Nasionál

Governu, liuhusi Ministru Asuntus Parlamentares no Komunikasaun Sosiál, Francisco Martins da Costa Pereira Jerónimo no Vise-Ministra Finansas, Sara Lobo Brites, ohin, loron 15 fulan-outubru tinan 2020, entrega ona Proposta Lei Orsamentu Jerál Estadu (OJE) tinan 2021 nian ba Prezidente Parlamentu Nasionál, Aniceto Guterres.

OJE tinan 2021 ne'e iha ninia prioridade sira hanesan dezvoltimentu kapitál sosiál, dezvoltimentu ekonómiku, ne'ebé aliña ho medida sira ne'ebé inklui ona iha Planu Rekuperasaun Ekonómika, dezvoltimentu infraestrutura bázika fundamentál nian sira, dezvoltimentu ambientál no dezvoltimentu institusionál no husi prosesu sira kona-ba reforma institusionál sira ne'ebé la'o hela.

Orsamentu Jerál Estadu tinan 2021 nian ne'e apresenta reseita no despeza hotu-hotu husi órgaun no servisu sira Setór Administrativu nian ba tinan finanseiru 2021, ho montante globál husi despeza konsolida ho valór hamutuk dolar amerikanu millaun \$2.029,5. OJE ne'e kompostu husi Orsamentu Administrasaun Sentrá, Orsamentu Rejiaun Administrativa Espesiál Oekusi Ambenu no Orsamentu Seguransa Sosiál nian.

“Despeza sira husi órgaun no servisu Administrasaun Sentrá nian sa'e ba dolar amerikanu millaun \$1.797,2”, no ninia “dotasaun sira fahe hanesan tuirmai ne'e, tuir klasifikasaun ekonómika: dolar amerikanu millaun \$228,2 ba Saláriu no Vensimentus; dolar amerikanu millaun \$397,3 ba Beins no Servisu; dolar amerikanu millaun \$694,9 ba Transferénsias Públikas; dolar amerikanu millaun \$58.8 ba Kapitál Menór; dolar amerikanu millaun \$417.7 ba Kapitál Dezenvolvimentu nian”.

“Despeza [Seguransa Sosiál nian] ho valór dolar amerikanu millaun \$177,3” no “despeza Rejiaun Administrativa Espesiál Oekusi Ambenu (RAEOA) nian sa'e ba dolar amerikanu millaun \$127,0”. “Dotasaun sira ba despeza [RAEOA] nian fahe hanesan tuirmai ne'e, tuir klasifikasaun ekonómika: dolar amerikanu millaun \$11,1 ba Saláriu no Vensimentus; dolar amerikanu millaun \$23,8 ba Beins no Servisu; dolar amerikanu millaun \$4,3 ba Transferénsias Públikas; dolar amerikanu millaun \$2.4 ba Kapitál Menór; dolar amerikanu millaun \$85,5 ba Kapitál Dezenvolvimentu nian”.

“Orsamentu Jerál Estadu tinan 2021 ne'e apresenta alterasaun metodolójika lubun ida-ne'ebé hakarak hakbesik orsamentu ne'e husi prátika orsamentál internasionál sira ne'ebé dí'ak liu, hodi hadi'a kualidade konsetuál Orsamentu Jerál Estadu nian, hodi armoniza apresentasaun informasaun no hodi aumenta ninia transparénsia”.

“Proposta Lei ne'e ba oin sei apresenta “tabela foun ida ho reseita no despeza sira husi Setór Públiku Administrativu hotu, hodi nune'e osan públiku sira hotu ne'ebé hakerek ona iha Orsamentu Jerál Estadu nian bele sai klaru liután”.

“Despeza sira Orsamentál Jerál Estadu ne'e ba oin sei apresenta no espesifika tuir programa sira, aleinde métodu klasifikasaun orgánika no ekonómika ne'ebé utiliza ona. Forma apresentasaun foun ida-ne'e permite atu transmite tan informasaun ba Parlamentu, liuliu kona-ba objetivu husi dotasaun orsamentál nian sira, hamutuk ho informasaun kona-ba autór despeza (klasifikasaun orgánika) no tipu despeza (klasifikasaun ekonómika) nian”.

url: <http://timor-leste.gov.tl?lang=tp&p=25929>